



## საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

---

### მეტურტლეთუხუცესი

მეტურტლეთუხუცესი, ვაზირი ფეოდალურ საქართველოში. „ხელმწიფის კარის გარიგების“ მიხედვით, მ. ძვ. ვაზირია. იგი ათაბაგობის შემოღებამდე მეოთხე ვაზირი ყოფილა და მსახურთუხუცესთან ერთად შედიოდა ორთა ვაზირთა ჯგუფში. მეფედ კურთხევის ცერემონიაზე, სასახლეში მიბრძანებისას, ხელმწიფეს ამირსპასალარის შემდეგ მ. მიეახლებოდა, მას კი მსახურთუხუცესი მიჰყვებოდა. მ. მეტურტლეთა უფროსი და სატურტლის, ანუ ხაზინის უზენაესი გამგებელი იყო. „ხელმწიფის კარის გარიგების“ მიხედვით, სატურტლეში ინახებოდა ყოველდღიურად სახმარი ქონება, განძეულობა, ოქრო-ვერცხლის ტურტელი კი სალაროში იყო „შეკრული“. მ-ს ჰყავდა მოადგილე – ნაცვალის სატურტლისა, ასევე მუშრიბი, სატურტლის მუქიფი და მეტურტლენი. მას როგორც ვაზირს, თავისი ბეჭედი ჰქონდა. მას ექვემდებარებოდა სამეფო ქალაქები, ვაჭრები და ქალაქის ამირები. მისი უწყება განაგებდა საბაჟო გადასახადებს. მ. ამავე დროს შეიძლება მსხვილი მემამულეც ყოფილიყო, მაგ., ერისთავთერისთავი.

ვახუშტი ბატონიშვილის ცნობით, XVII ს-ში, როსტომ მეფის რეფორმის შემდეგ, მ. მოლარეთუხუცესმა შეცვალა.

ლიტ.: ანთელავა ი., საქართველოს საისტორიო წყაროთმცოდნეობითი ძიებანი, თბ., 2002; თ ა ყ ა ი შ ვ ი ლ ი ე., ხელმწიფის კარის გარიგება, ტფ., 1920; მ ე ტ რ ე ვ ე ლ ი ვ., საქართველოს სახელმწიფოსა და სამართლის ისტორია, თბ., 2003; ს უ რ გ უ ლ ა ძ ე ი., ქართული სამართლის ისტორიის წყაროები, თბ., 2002; ჯ ა ვ- ა ხ ი შ ვ ი ლ ი ი ვ., თხზულებანი თორმეტ ტომად, ტ. 7, თბ., 1984.

**ი. უჯმაჯურიძე**

---